



Avannaata kommuniani kommunalbestyrelsi sinnerlugu tamassi maanga takkussisimasusi tikilluaqqussi ullorsiorntsinnilu pilluaritsi.

Nuna naqqaniit sanarfisassaavoq, innuttaasut kiffaanngissusiiarnagit, innuttaasulli akisusaaffimmik tuniorarlugit imminnut akisussaaffigisunngortillugit.

Nersorpakka innuttaasugut sulilluartut, innuttaasugut tamangajaavimmik aalajaallutik suliffeqarput ullullu tamaasa assakaasut ingerlanneqarnerannut annertuumik tapertaallutik.

Avannaata kommuniani innuttaasutta ilisarnaatigaat piumasuseqarneq, nammineerusussuseqarneq, angusaqarusussuseqarneq pilersitserusussuseqarnerlu.

Innuttaasut imminnut tatigalutik, imminnut akisusaaffigalutik, pisortanut utaqqiinnartuunatik sapiissuseqarlutik inuiaqatigiit assakaasuannut tapertaallutik imminnut pilersortut innuttaraagut.

Inuiaqatigiit assakaasui ingerlakkusuppagut innuttaasut pinginnaasaat atorluarlugit, upperilluinnarparalu taamatut iliorutta inuiaat nukittuut pilersissinnaallutigit.

Inuit pinginnaanilissuit innuttaraagut, tamannalu tulluusimaarutigiuannarpara.

Inuiattut ataatsimoortutut uatsinnut suleqatigiippugut.

Kommunitsinni suliffissaaleqisoqanngingajaavippoq.

Innuttaasut kommunitsinnut akileraarnermikkut kivitseqataasinnaasut pisariaqartippagut, kommunitsinni sulisussanik amingaateqarnerput annertummat.

Assakaasut ingerlaussappata ingerlaannassappatalu, innuttaasullu uneqattaanngitsumik sullinneqassappata, suliffeqarfiillu sulisussanik amingaateqarlutik uneqattaartumik ingerlassanngippata tamatta uatsinnut pisariaqartippugut.

Inuiaqatigiit assingiingitsorpassuit allamiut suliartortut ullut tamaasa suliffeqarfinni amerlasuuni suleqatigaagut aamma ulluinnarni illoqarfitsinni nunaqarfitsinnilu ullut tamaasa innuttaasut ornittagaanni pisiniarfinni allanilu inooqatigilernikuuagut.

Ukiunilu kingullerni avataaniit tikittartut suli amerliartorput, aamma suli amerliartornissaat saneqqunneqarsinnaarpasinngilaq, inuit suliffeqarfinni amingaatisagut suli amerliartornissaat naatsorsuutini takuneqarsinnaammat.

Suliffeqarfiit sulisussanik amingaateqarnerat kommunitta ineriartortinneqarnissaanut arrilisaataavoq.

Inissaaleqineq sulisussaaleqinerlu tassaapput kommunitsinni unamminartut annerpaartaat.

Sanaartornermi, tunisassiorfinni, takornariaqarnermi unnuisarfinni neriniartarfinnilu allaat aalisartut akornanni sulisussanik amingaateqarnerput aporfiunerpaauvoq.



Taamaattumik kommunalbestyrelsi aalijangernikuuvoq inissianik sanaartornerit sanaartorfissanillu nunagissaanerit sukkanerusumik ingerlasariaqartut.

Sanaartornermut aningaasalissuutaasartut qaavatigut aningaasanik amerlasuunik atorniarnissaq kommunalbestyrelsip siunniuppa, sukkanerusumik inissamik utaaqisut initarsinnaalernissaat aqqutissiunniarlugu sanaartornerullu sukkanerusumik ingerlanneqarnissaa piviusunngortinniarlugu.

Iliuseqanngitsut kukkuneq ajorput, aamma iliuseqanngitsut uninngaannartarput.

Kommunitsinni ilaatigut iliuserisimannngisaannakkatsinnik sapiiserluta iliuseqalerpugut.

Kommuniuvugut nutaaliornissamut sapiissuseqartoq ingerlariaqqikkusuttorlu.

Takutikkusuttuaannarparput paasitikkusullungulu kommunerput kommuniusoq inunnik qitiutitsisusooq aamma eqqunngitsumik pinnittoqaraagat iliuseqartartusooq.

Kommunimi sulisugut ullut tamaasa sullipput innuttaasut pitsaanerpaamik sullikkusullugit.

Ilaatigut piffiit ilaanni sulisunik amingaateqarnerup kingunerisaanik sulisut ilaannut sulipilunnermik kinguneqartarpoq.

Sulisugut nersortaqaakka aamma paarilluarneqarnissaat pingaartinnerpaavara, suliammi ilaat ima oqimaatsigisarput sulisunut annertuumik peqqissutsikkut sunniuteqarsinnaasarlutik.

Taamaattoqartillugulu uagut qinikkatut sulisut sakkussaannik ikiorneqarnissaannullu sakkulersornissaannut eqqummaarinnerulluta pikkorinnerusariaqarpugut.

Innuttaasutta ulluinnarni sullinneqarnerat pitsaanerusumik ingerlalissappat nunap allap inatsisai nunatsinnut assiliinnarlugit nuussiinnarluni inatsisiliortarnek unitsinneqartariaqarpoq.

Inatsisit ilaarsiinnarunnaarlugit nammineq inatsisit nunatsinnut tulluussarlugit aaqinneqartariaqarput, innuttaasugut pitsaanerusumik atugaannullu tulluunnerusumik sullinniarutsigit.

Nammineq nunatsinnut inooriaattitsinnut innuttaasunullu tulluuttunik nunarput inatsiseqartariaqarpoq.

Massakut suleriuserput oqimaattorujussuuvoq inatsisit ilaatigut naammassisinnaanngisagut sulinitsinni tunngavigisariaqartarpagut, nalunngikkaluarlugu sullinniakkatsinnut sulisutsinnullu piumasaqaataasunut sualummik isorliunerusuni naammassineqarsinnaanngitsut sulisutigut ilinniarsimassutsikkut atortussatigullu amingaateqarnitta siammasissumillu inooriaseqarnitta kingunerisaanik.

Ulluinnarni suliat ilungersunartunik taasartakkagut ilaatigut paquminartunik taasartakkagut nipangiutiinnarlugit toqqortussanngilagut, aamma nalinginnaasumiit allaaneruppata annernarpataluunniit tunuarsimaaffigissanngilagut eqqartussallutigut.

Pisimasut ilumoortut paasisariaqarpagut ajorpata ajunngippataluunniit.

Taamaasiortoqarpammi aatsaat allannguissamut sakkussaqaalissuugut allannguissarlu siunertaralugu sulinerput ingerlateqqissinnalissallugu.



Paasisagut nutaat atortigit inuiat akornanni paasininnerusumik ataatsimoorfiusumillu inooqatigiinnissatsinnut.

Inuiattut kinaassuserput suli ersarinnerusumik atussagipput inuusuttut qujanartumik ersarissumik oqaatigisalernikuaat, tamannalu inuiattut ataatsimoorfittut nukittorsaatigalugu atorluartariaqarparput.

Utoqqartagut ataqqinartut tusarnaarnerusariaqarpagut.

Inuiaat ingerlarsortut sorlaminnik siuaaminnik ataqqinnittut pilersikkusuppagut tamannalu angorusullugu utoqqaat misilittagaat pisariaqartippagut tusassallugit.

Katersugaasivik inuussutissarsionermullu immikkoortortaqarfipput suleqatigiillutik kommunitsinni innuttaasut oqaluttuat immiullugit katersorlugit aallartinnikuaat.

Inuit namminneq atugarisimasatik, misigisarsimasatik, inuussutissarsionerminni misilittakkatik qujanartumik kinguaminnut tunniukkusullugit suleqataalluarlutik oqaluttuaat katersorneqarput, kinguaariit uagullumi paasisaqarnerulersilluta aqqusaarsimasallu tusarlugit ilikkangaqartinneqarluta sulinitsinni atorsinnaasatsinnik.

Kultorikkut, timersornikkut susoqartillugu inuiaassuserput ataatsimoorfittut ersersittarparput, ataavartumilli tamanna ingerlattariaqarparput.

Oqaatsit sequtserinernut ikinngutigiiinnerillu kipitinneqarnerinut atorneqarsinnaapput, illuatungaani oqaatsit sakkutut atorsinnaavagut nunarsuatsinni pitsanngorsaatitut ataqatinnerunissatsinnullu paaseqatigiinnerunissatsinnullu.

Kiinnamiit kiinamut imminut qiviarluni maniguuttumik oqaloqatigiinneq inuit akornanni eqqortumik paaseqatigiinnissamut aqquataavoq.

Inuiaqatigiisugut kamak, akiniaaniarneq, akeqqersornerillu atorlugit attaveqarniartarnerput atorunnaartariaqarparput. Taamatut iliornerit kinguneriinnartarpaat ataavartumik imminut taamatut piuarneq.

Ikinngutigiiinneq ataqqe-qatigiinneq paaseqatigiinnerlu taassaapput matuersaatit ineriartoqatigiinnissamut paaseqatigiinnissamullu.

Inuk ataaseq avissaartuutitsippat eqqaamassavarput amerlasoorujussuarnik inoqarmat nakkaqqagutta kivitserusuttunik, aliasunnitsinni sernersaarussuttunik ikiuukkusuttunik aamma kaffillerusuttunik.

Inuttut ilittut ittumik allamik inuusoqanngilaq, aamma ilittut ittumik inummik allamik inuusoqarnikuunngilaq, pisariaqartippatsigit.

Neriuppunga siunissami isummagut assingiingikkaluarpataluunniit paaseqatigiilluarsinnaalissasugut killissaritaasut qaangerlugit iliuungikkaluarluta.

Qanga pisimasut ilinniutigalugit siunissamut isumalluarluta inuuneq ullumikkut atugarput inuuffigitigu.

Ataatsimoorneq ataqqillugu, ikioqatigiinneq pingaartillugu, assingiingissutsigit isumallu assingiingissinnaanerit ataqqillugu tamatta suleqatigiissuugut.

Tamassi ullorsiorluarisi

Qujanaq



Avannaata
Kommunia